

Diplomatski zimski bazar udruženjima dodijelio 212.000 KM

FENA
13.2.2019. u 13:35



foto: D. S./Klix.ba

Organizacioni odbor Diplomatskog zimskog bazara, održanog u decembru prošle godine, danas je svečano dodijelio 212.000 KM za 17 udruženja koje su posvećene radu s djecom i mladima.

"Želja je bila da dođemo do najudaljenijih područja BiH, pomognemo marginaliziranim skupinama djece i pružimo podršku njihovim porodicama", kazala je članica Organizacionog odbora Annarita Lippiello.

Izrazila je zadovoljstvo ostvarenim rezultatima Diplomatskog zimskog bazara koji je premašio očekivanja, a želja je bila pružiti podršku udrugama koje pomažu djecu s posebnim potrebama, djecu koja odrastaju bez roditeljske skrbi ili u teškim uslovima ili kojima je nužna financijska pomoć da bi nastavili obrazovanje.

Udruge dobitnice sredstava prikupljenih na Bazaru 2018. godine su SOS Dječija sela BiH u Srebrenici (10.000 KM), Franjevački međunarodni studentski centar u Sarajevu (25.000 KM),

Obrazovanje gradi BiH Sarajevo (15.000 KM), Centar za djecu i omladinu s posebnim potrebama Los Rosales u Mostaru (27.000 KM), Down sy i mi iz Banja Luke (20.000 KM), Dajte nam šansu iz Sarajeva (10.000 KM), Prijateljska Kuća iz Doboja (10.000 KM), Srce za djecu oboljelu od raka u Tuzli (25.000 KM).

Sredstva su dobila i udruženja Dječiji centar Gnijezdo iz Bosanskog Grahova (10.000 KM), Dnevni centar Gnijezdo iz Stoca (10.000 KM), Udruženje za podršku djeci i roditeljima Budućnost iz Sarajeva (15.000 KM), Rastimo Zajedno iz Gackog (5.000 KM), Lotos - Zaštita mentalnog zdravlja iz Zenice (5.000 KM), Međunarodni forum solidarnosti EMMAUS iz Doboja (5.000 KM), Grace Valley centar u okolici Zenice (10.000 KM), Angelus - Udruga za roditelje djece s posebnim potrebama iz Domaljevca-Šamca (5.000 KM) i Udruženje Tračak nade iz Foče (5.000 KM).

Čelnicima udruženja čekove su uručili predstavnici međunarodne i lokalne zajednice, ambasadori Velike Britanije i Republike Italije u BiH Matthew Field i Nicola Minasi, kao i članice Organizacionog odbora bazara: Annarita Lippiello (Italija), Martina Field-Klisović (UK), Zsofia Kuszenda (EU), Anthoussa Diakopoluos (Grčka), Darina Kolembusova i Katerina Szep (Slovačka), Flore Blancpain Filipović (ICRC), Natasha Bajuk (IMF), Anna Leko (Mađarska) i Madeline Ben Artikovic, kao i neki od sponzora Bazara.

Članice Organizacionog odbora su zaključile da je Bazar još jednom pokazao da je "raditi zajedno ključ uspjeha", a takav uspjeh je potvrđen velikim učešćem međunarodnih i lokalnih organizacija.

Na decembarskom Diplomatskom bazaru 2018. učestvovalo je 40 ambasada i međunarodnih organizacija, kao i 70 lokalnih organizacija, izlagača i sponzora, a zabilježeno je više od 15.000 posjetilaca.